

07 JUL 1997

Kempen

MISI JALAN RAYA 2000 TINGKATKAN KESEDARAN PENGGUNA

KUALA LUMPUR, 7 Julai (Bernama) -- "Misi Jalan Raya 2000", satu kempen bagi mengurangkan kemalangan maut dan jumlah kemalangan di jalan raya, akan dilancarkan 22 Julai ini.

Kempen tiga tahun itu yang bertujuan mengambil langkah pro-aktif ke arah menangani masalah yang dihadapi di jalan-jalan, akan dilancarkan Menteri Pengangkutan Datuk Seri Ling Liong Sik.

Setiausaha Parlimen Kementerian Pengangkutan Chor Chee Heung hari ini berkata kempen bertemakan "Ke arah Kesopanan di Jalan Raya" itu ditaja sepenuhnya oleh Kurnia Insurans Berhad.

"Kempen itu akan bermula 22 Julai ini sehingga tahun 2000," katanya ketika memberi taklimat mengenai misi itu di sini.

Chor berkata kempen itu, yang paling lama dan kali pertama melibatkan sektor swasta, akan mendapat sokongan dan kerjasama penuh kementerian, Polis Diraja Malaysia, Majlis Keselamatan Jalan Raya, beberapa persatuan dan pertubuhan swasta.

Chor berkata kementerian juga akan melancarkan pelbagai kempen bagi meningkatkan kesedaran pengguna jalan raya yang akan dilancarkan Perdana Menteri Datuk Seri Dr Mahathir Mohamad Ogos ini.

Beberapa aktiviti kempen itu yang akan dilaksanakan dalam tiga fasa akan meliputi simposium, kempen anti samseng jalan raya, pemandu cuai, penyenggaraan kenderaan dan kempen mendidik pelajar sekolah.

Strategi kempen itu ialah untuk mencapai misi yang ditetapkan melalui empat kaedah -- memberi ganjaran, mendidik, menghindari melalui mesej dan menghukum, katanya.

Chor berkata sebanyak 400,000 pelekat kereta Misi Jalan raya 2000 akan diedarkan kepada semua pemegang polisi insurans Kurnia, orang ramai dan satu peraduan mengesan pelekat yang menawarkan hadiah berjumlah RM100,000 akan turut diadakan.

Ketua Pegawai Eksekutif dan Pengarah Urusan Kurnia Insurans Adrian Loh berkata syarikatnya buat permulaan akan membelanjakan kira-kira RM1.5 juta setahun untuk kempen itu kebanyakannya terhadap iklan.

Pengarah Penguatkuasa Jabatan Pengangkutan Jalan Haji Shamsul Ariffin Mohamad berkata jabatan itu mungkin menimbangkan untuk mengurangkan denda terhadap pemandu yang menggunakan pelekat kempen itu bagi menggalakkan penyertaan mereka. -- BERNAMA

NHD MS RON